

**MESYUARAT KEDUA PENGGAL KEEMPAT
DEWAN UNDANGAN NEGERI PULAU PINANG
YANG KEEMPAT BELAS
26 NOVEMBER 2021**

PERKARA : 4(B)(XX)1

**SOALAN BERTULIS OLEH AHLI KAWASAN BERTAM
YB. KHALIQ MEHTAB BIN MOHD ISHAQ**

1. Adakah Kerajaan Negeri memperuntukkan sejumlah peruntukan untuk membina projek perumahan rakyat (PPR) dan projek sewa beli?
 - (a) Nyatakan jumlah peruntukan.
 - (b) Senaraikan projek PPR dan sewa beli yang telah dibina dan akan dibina mengikut tahun, daerah dan lokasi.

**YB. JAGDEEP SINGH DEO A/L KARPAL SINGH
MENJAWAB BAGI PIHAK Y.A.B. KETUA MENTERI**

1. (a) Unit sewaan daripada Program Perumahan Rakyat (PPR) yang kini dikenali sebagai Rumah Malaysia Disewa (RMD) amat diperlukan mengambil kira senarai menunggu unit sewaan PPR berjumlah sebanyak 1,244 pemohon dan khusus di daerah Timur Laut sebanyak 826 pemohon (66.4%). Strategi kedua dalam membantu mereka yang sukar mendapatkan pembiayaan perumahan adalah melalui penyediaan Skim Sewa Beli sebanyak 22,000 unit menjelang tahun 2030. Setakat ini sebanyak 2,510 unit telah berada di dalam rekod Lembaga Perumahan Negeri Pulau Pinang (LPNPP) dimana sebahagiannya telah ditawarkan dan masih berbaki. Kerajaan Negeri juga telah menanggung kos pembangunan dan pembelian unit daripada pemaju sebanyak RM94.6 juta melibatkan 10 skim perumahan bagi membeli dan membiayai kos pembangunan bagi penyediaan unit sewa beli ini. Inisiatif sewa beli ini juga turut melibatkan agensi Kerajaan Persekutuan dan diharapkan lebih banyak unit RMM

dapat ditawarkan untuk rakyat Pulau Pinang. Senarai skim dan projek sewa beli seperti di **LAMPIRAN A**.

- (b) Konsep PPR atau RMD memerlukan Kerajaan Persekutuan untuk membiayai kos pembangunan, manakala Kerajaan Negeri menyediakan tapak tanah bagi tujuan pembangunan. Sehubungan dengan itu, lima (5) cadangan tapak telah dikemukakan sejak 2017 seperti berikut:

BIL.	LOT	KELUASAN	DAERAH	KADUN
1.	Lot 10042, Lot 10043 dan sebahagian petak A di Seksyen 1, Bandar Jelutong	44.81 ekar	Timur Laut	Sungai Pinang
2.	Berhampiran Lot 8471, Jalan Mayang Pasir, Mukim 12, Bayan Baru	7.82 ekar	Barat Daya	Batu Maung
3.	Lot 20841, 20842, 20843 Mukim 13	3.43 ekar	Seberang Perai Selatan	Batu Kawan
4.	PT 724, Seksyen 4, Ujong Batu, Butterworth	13.4 ekar	Seberang Perai Utara	Bagan Dalam
5.	1061 hingga 1065, 1072 hingga 1078, 1084 hingga 1088, 20843 & 20842, Mukim 14, Kampung Tongkang	24.81 ekar	Seberang Perai Tengah	Machang Bubuk

Kerajaan Negeri sendiri berulang kali memohon untuk pembinaan PPR dan Kerajaan Pusat telah mengulangi komitmen untuk membekalkan dua (2) projek PPR/RMD di negeri Pulau Pinang dalam Bajet 2022 iaitu satu di kawasan Pulau dan satu di kawasan Seberang Perai. Jika sekiranya KPKT tidak dapat melaksanakannya, maka Kerajaan Negeri sedia untuk melakukannya melalui LPNPP.

LAMPIRAN A

**SENARAI SKIM PERUMAHAN YANG DITAWARKAN SECARA SEWA BELI
OLEH KERAJAAN NEGERI PULAU PINANG**

Bil.	Skim Perumahan	Jenis RMM	Jenis Kediaman	Status	Jumlah Unit
1.	Taman Prestij Idaman, Barat Daya	A	Strata	Siap	612
2.	B Park, Barat Daya	A	Strata	Perancangan	500
		B			
3.	PPR Tok Suboh, Seberang Perai Tengah	B	Teres	Siap	231
4.	PPR Mak Mandin, Seberang Perai Tengah	B	Strata	Siap	70
5.	Taman Seri Desa, Seberang Perai Utara	A	Teres	Siap	64
6.	Taman Seruling Emas, Seberang Perai Selatan	A	Strata	Siap	51
7.	Taman Sungai Duri Emas, Seberang Perai Selatan	A	<i>Townhouse</i>	Siap	104
8.	Rumah Pangsa Desa Wawasan, Seberang Perai Tengah	A	Strata	Siap	456
9.	Rumah Pangsa Mak Mandin, Seberang Perai Utara	A	Strata	Siap	138
10.	Byram, Daerah Seberang Perai Selatan	A	Teres	Pembinaan	68
11.	Taman Sejahtera, Seberang Perai Selatan	B	Teres	Siap	41
12.	Taman Desa Tok Suboh, Seberang Perai Tengah	B	Teres	Siap	39
13.	Taman Desa Ara Permai, Seberang Perai Tengah	A	Teres	Siap	100
		B			
14.	Murai Jaya	A	Teres	Pembinaan	36
	Jumlah				2,510

**MESYUARAT KEDUA PENGGAL KEEMPAT
DEWAN UNDANGAN NEGERI PULAU PINANG
YANG KEEMPAT BELAS
26 NOVEMBER 2021**

PERKARA : 4(B)(XX)2

**SOALAN BERTULIS OLEH AHLI KAWASAN BERTAM
YB. KHALIQ MEHTAB BIN MOHD ISHAQ**

2. Program Larangan Penggunaan Beg Plastik.
- (a) Nyatakan hasil kutipan caj mengikut tahun.
 - (b) Nyatakan penggunaan hasil kutipan tersebut dan tujuan penggunaan mengikut tahun.
 - (c) Sejauh manakah keberkesanan program setelah caj dinaikkan dari 20 sen kepada RM1.00?

**YB. PHEE BOON POH
MENJAWAB BAGI PIHAK Y.A.B. KETUA MENTERI**

2. (a) Jumlah kutipan caj beg plastik yang diperolehi sejak kempen Hari Tanpa Beg Plastik Percuma dilancarkan dari tahun 2009 sehingga 31 Oktober 2021 adalah sebanyak RM14,524,534.43 dengan perincian mengikut tahun seperti di **LAMPIRAN A**.
- (b) Hasil kutipan caj penggunaan beg plastik oleh Kerajaan Negeri akan disatukan di dalam Tabung Amanah Kebajikan (Kod Amanah 57019) yang kemudiannya digunakan untuk membiayai pelaksanaan program-program kebajikan seperti Program Bantuan Agenda Ekonomi Saksama (BAES).

Kerajaan Negeri telah memberi bantuan kewangan bulanan melalui Program BAES untuk membantu dan membasmi kemiskinan di Negeri Pulau Pinang. Pemberian BAES merupakan kesinambungan pemberian Bantuan Am

Jabatan Kebajikan Masyarakat (JKM) yang dijenamakan semula daripada Program Agenda Ekonomi Saksama (AES) dengan kadar bantuan antara RM100.00 hingga RM1,300.00. Kadar pendapatan per kapita (PPK) iaitu RM260.00 telah digunakan mulai September 2020 bagi penyaluran bantuan berkaitan di bawah peruntukan Kerajaan Negeri.

Bagi tahun 2021 iaitu bagi tempoh Januari hingga Oktober, Kerajaan Negeri telah membelanjakan sebanyak RM6,292,898.00 yang memberi manfaat bulanan kepada 1,614 Ketua Isi Rumah (KIR).

- (c) Kempen No Free Plastik Bag telah mula diperkenalkan sejak tahun 2009 yang merangkumi beberapa fasa termasuk pengenalan kadar caj RM0.20 bagi setiap helaian beg plastik. Pelbagai usaha dan kempen telah dilaksanakan untuk memberi pendidikan dan kesedaran kepada orang awam sekiranya beg plastik ini digunakan secara berleluasa dan dibuang atau diuruskan dengan cara yang tidak betul. Bermula Januari 2021, kerajaan negeri telah mengambil inisiatif dengan menaikkan kadar caj sumbangan kutipan beg plastik dari RM0.20 ke RM1.00 bagi setiap helaian beg plastik dan tiada beg plastik yang akan dibekalkan oleh premis-premis perniagaan terlibat pada setiap hari Isnin, Selasa dan Rabu sempena Kempen Hari Tanpa Beg Plastik Negeri Pulau Pinang (*No Plastic Bag Day*).

Tujuan kadar caj beg plastik dinaikkan adalah untuk menggalakkan pengguna menggunakan beg kain atau beg yang boleh diguna semula dan mengurangkan permintaan beg plastik semasa membeli-belah.

Peningkatan kadar caj beg plastik telah mula diperkenalkan pada awal tahun ini dan ianya masih dalam fasa pendidikan dan kesedaran. Situasi Covid-19 yang melanda negara sedikit sebanyak memberi kesan terhadap proses hebahan dan pemantauan oleh pihak berkuasa tempatan. Walau bagaimanapun, berdasarkan soal selidik yang telah dijalankan oleh Kerajaan Negeri melalui Penang Green Council (PGC) mengenai Kesan Perintah Kawalan Pergerakan terhadap Penjanaan Sisa di Pulau Pinang, 81%

responden menyatakan bahawa mereka lebih kerap menggunakan beg yang boleh diguna semula semasa membeli-belah berbanding beg plastik. Ini menunjukkan bahawa pelaksanaan kempen ini telah berjaya mempengaruhi tahap kesedaran pengguna untuk mengurangkan penggunaan beg plastik.

Pihak PGC juga dalam proses untuk menyediakan pasca soal selidik mengenai persepsi orang awam terhadap larangan penggunaan plastik sekali guna dan implikasi caj yang dikenakan untuk memahami tahap kesedaran pengguna dan sekaligus membantu penggubal dasar memahami dengan lebih baik tentang pandangan pengguna sebelum membentuk polisi tersebut.

LAMPIRAN A

**PERINCIAN KUTIPAN MENGIKUT TAHUN BAGI
KEMPEN HARI TANPA BEG PLASTIK PERCUMA NEGERI PULAU PINANG
DARI TAHUN 2009 SEHINGGA 31 OKTOBER 2021**

TAHUN	JUMLAH KUTIPAN (RM)
2009	28,496.00
2010	268,036.00
2011	738,253.00
2012	1,206,035.00
2013	959,826.00
2014	1,040,750.00
2015	719,006.00
2016	827,470.00
2017	1,391,158.00
2018	1,615,623.00
2019	1,990,507.00
2020	2,006,694.03
2021 (Sehingga 31 Oktober)	1,732,680.40
JUMLAH KESELURUHAN	14,524,534.43

**MESYUARAT KEDUA PENGGAL KEEMPAT
DEWAN UNDANGAN NEGERI PULAU PINANG
YANG KEEMPAT BELAS
26 NOVEMBER 2021**

PERKARA : 4(B)(XX)3

**SOALAN BERTULIS OLEH AHLI KAWASAN BERAPIT
YB. KHALIQ MEHTAB BIN MOHD ISHAQ**

3. Pinjaman Pendidikan Pulau Pinang.

- (a) Nyatakan status dana Pinjaman Pendidikan Pulau Pinang.
- (b) Berapakah pemohon mengikut tahun, bangsa dan jumlah yang dipinjamkan?
- (c) Mengapakah pihak Kerajaan Negeri tidak melanjutkan moratorium kepada peminjam selama enam (6) bulan lagi sedangkan Kerajaan Pusat melanjutkan tempoh bayaran balik selama enam (6) bulan lagi?

**YB. PROF. DR. P. RAMASAMY A/L PALANISAMY
MENJAWAB BAGI PIHAK Y.A.B. KETUA MENTERI**

3. (a) Dana Pinjaman Pendidikan Negeri Pulau Pinang diselaras melalui Tabung Amanah Biasiswa dan Pinjaman Penuntut. Status Tabung Amanah Biasiswa Dan Pinjaman Penuntut Negeri Pulau Pinang adalah masih aktif sehingga kini. Sumber peruntukan tabung ini adalah daripada kutipan bayaran balik pinjaman dan peruntukan tahunan dari Kerajaan Negeri. Sehingga 31 Oktober 2021, baki Tabung Amanah Biasiswa dan Pinjaman Penuntut adalah berjumlah RM29,712,366.66.

- (b) Jumlah pemohon Pinjaman Pendidikan Negeri Pulau Pinang dari tahun 2011 hingga 2021 mengikut tahun, bangsa dan jumlah pinjaman adalah seperti berikut :-

Tahun	Jumlah Permohonan	Bangsa				Jumlah Setuju Terima Tawaran	Jumlah Pinjaman (RM)
		Melayu	Cina	India	Lain-lain		
2011	353	254	41	55	3	174	669,000.00
2012	234	174	20	37	3	148	510,250.00
2013	166	131	7	28	0	127	616,000.00
2014	200	138	36	26	0	147	755,500.00
2015	332	254	47	31	0	192	1,032,500.00
2016	404	296	70	35	3	314	1,603,000.00
2017	454	334	66	50	4	354	1,878,500.00
2018	381	280	56	42	3	288	1,570,000.00
2019	436	304	73	56	3	335	1,683,000.00
2020	245	171	39	35	0	196	1,051,500.00
2021	150	104	25	20	1	140	739,500.00

- (c) Secara keseluruhannya, Kerajaan Negeri juga telah memberi penangguhan bayaran balik Pinjaman Penuntut Negeri Pulau Pinang selama 6 bulan sepanjang tempoh pandemik Covid-19. Kerajaan Negeri melalui Pakej Bantuan Rakyat Negeri Pulau Pinang yang diumumkan oleh YAB Ketua Menteri pada 25 Mac 2020, telah meluluskan penangguhan bayaran balik Pinjaman Penuntut Negeri Pulau Pinang selama tiga (3) bulan mulai 1 April hingga 30 Jun 2020.

Bagi tahun 2021, Kerajaan Negeri telah meluluskan penangguhan bayaran balik Pinjaman Penuntut Negeri Pulau Pinang iaitu pemberian moratorium bersasar kepada peminjam yang terkesan dengan pandemik Covid-19 dan belum berupaya untuk membuat bayaran balik pinjaman. Permohonan penangguhan telah dibuka melalui 1 September hingga 30 Oktober 2021. Tempoh penangguhan adalah selama tiga (3) bulan bermula pada bulan permohonan. Peminjam yang layak perlu membuat permohonan secara dalam talian di Portal Pinjaman Penuntut. Peminjam yang memenuhi kriteria berikut adalah layak untuk memohon iaitu:

- (i) Peminjam yang kehilangan pendapatan iaitu diberhentikan pekerjaan dalam tempoh pandemik COVID-19; atau
- (ii) Peminjam yang terjejas pendapatan iaitu pendapatan berkurang dalam tempoh pandemik COVID-19.

**MESYUARAT KEDUA PENGGAL KEEMPAT
DEWAN UNDANGAN NEGERI PULAU PINANG
YANG KEEMPAT BELAS
26 NOVEMBER 2021**

PERKARA : 4(B)(XX)4

**SOALAN BERTULIS OLEH AHLI KAWASAN BERTAM
YB. KHALIQ MEHTAB BIN MOHD ISHAQ**

4. Apakah tindakan Kerajaan Negeri untuk memastikan bahawa aduan penduduk mengenai kilang haram tidak beroperasi di kawasan perumahan? Aduan kilang sejuk beku di Jalan Tiga Lahar Bubu telah dibuat tetapi masih belum menampakkan penyelesaian.

**YB. JAGDEEP SINGH DEO A/L KARPAL SINGH
MENJAWAB BAGI PIHAK Y.A.B. KETUA MENTERI**

4. Kerajaan Negeri sentiasa prihatin terhadap aduan yang dikemukakan oleh orang awam. Bagi menangani isu pengoperasian kilang haram di kawasan perumahan, Kerajaan Negeri melalui Pihak Berkuasa Tempatan boleh mengambil tindakan melalui peruntukan undang-undang yang berkuatkuasa.

Berhubung isu kilang sejuk beku di Jalan Tiga Lahar Bubu, Kerajaan Negeri melalui Majlis Bandaraya Seberang Perai (MBSP) telah mengambil tindakan penguatkuasaan sejak dari tahun 2020 berikutan terdapat aduan isu kacau ganggu oleh penduduk setempat.

Pihak MBSP juga telah mengambil tindakan tegas berhubung isu aduan di kilang sejuk beku di Jalan Tiga Lahar Bubu dengan mengeluarkan Notis Menghendaki Perniagaan Dihentikan kepada pemilik perniagaan di bawah Akta Kerajaan Tempatan 1976 pada 13 Mac 2020 dan juga tawaran kompaun di atas kesalahan tidak mematuhi syarat-syarat pelesenan di bawah Akta Jalan, Parit dan

Bangunan 1974 pada 11 Jun 2020 kerana menumpahkan cecair sisa buangan terus ke parit.

Selain itu, pihak MBSP telah mengeluarkan Notis Binaan Tanpa Kebenaran serta mengarahkan binaan tersebut dirobuhkan dalam tempoh 30 hari dari tarikh notis pada 21 Mei 2020 dan mengeluarkan Notis Mengosong Bangunan dalam tempoh 30 hari pada 30 Jun 2020.

Sehubungan itu, pihak MBSP juga telah melakukan sekatan pembaharuan lesen perniagaan kepada pihak syarikat pada 23 September 2020. Melalui surat Setiausaha Bandaraya bertarikh 2 Mac 2021, pihak MBSP dibenarkan untuk mengambil tindakan penguatkuasaan terhadap binaan kilang tersebut.

Semua notis prosedur tindakan penguatkuasaan di peringkat MBSP telah lengkap dikeluarkan. Seterusnya, kes ini dirujuk kepada Direktorat Penguatkuasaan pada 26 Ogos 2021 untuk tindakan selanjutnya.

Pihak syarikat telah disabitkan kesalahan dan diambil tindakan undang-undang di mahkamah selaras dengan Akta Kerajaan Tempatan 1976 bagi kesalahan menyebabkan kacau ganggu. Pihak mahkamah pada 6 September 2021 telah menjatuhkan hukuman denda sebanyak RM1,300.00 kepada pihak syarikat.

Pihak mahkamah juga telah memerintahkan supaya pihak syarikat menghapuskan kacau ganggu tersebut dalam tempoh 30 hari bermula 6 September 2021. Pemantauan terkini pada 1 November 2021 mendapati tiada isu bau dan premis perniagaan dilihat dalam keadaan bersih.

Pihak MBSP kini sedang menyediakan dokumentasi bagi tindakan pembatalan lesen perniagaan pihak syarikat setelah pihak syarikat gagal mendapatkan kelulusan Pelan Kebenaran Merancang (PKM) dan Pelan Bangunan serta telah disabitkan kesalahan menyebabkan kacau ganggu dan dijatuhkan hukuman denda sebanyak RM1,300.00 oleh pihak mahkamah.

**MESYUARAT KEDUA PENGGAL KEEMPAT
DEWAN UNDANGAN NEGERI PULAU PINANG
YANG KEEMPAT BELAS
26 NOVEMBER 2021**

PERKARA : 4(B)(XX)5

**SOALAN BERTULIS OLEH AHLI KAWASAN BERTAM
YB. KHALIQ MEHTAB BIN MOHD ISHAQ**

5. Mengikut data Jabatan Perangkaan Malaysia, kadar pengangguran di Pulau Pinang mencatat 3.5% pada 2020. Ianya meningkat 1.5% dari 2019.
- (a) Apakah tindakan Kerajaan Negeri untuk mengatasi masalah ini?

**YB. PROF. DR. P. RAMASAMY A/L PALANISAMY
MENJAWAB BAGI PIHAK Y.A.B. KETUA MENTERI**

5. Antara tindakan yang telah diambil oleh Kerajaan Negeri dalam membantu rakyat Negeri Pulau Pinang yang kehilangan pekerjaan dan punca pendapatan adalah seperti berikut:
- (i) Kerajaan Negeri Pulau Pinang menerusi Pusat Bantuan Kerjaya dan Bakat Pulau Pinang (Pusat CAT) telah melaksanakan pemadanan kerja secara berkumpulan (*group job matching*) untuk membantu pencari kerja dengan menjalankan pemadanan jawatan bersesuaian apabila menerima permintaan daripada majikan/syarikat. Pusat CAT akan mendapatkan maklumat tentang jenis pekerjaan untuk syarikat yang mengalami penutupan. Susulan itu, Pusat CAT akan menjalankan prosedur pemadanan kerja secara berkumpulan dengan syarikat yang memperluaskan operasi;
- (ii) Laman sesawang Pusat CAT menjadi satu titik tumpuan kepada majikan dan juga pencari kerja. Melalui perkhidmatan percuma laman sesawang Pusat CAT ini, pihak majikan dapat mempromosi peluang pekerjaan yang

ditawarkan manakala pencari kerja juga dapat memohon pekerjaan yang ditawarkan menerusi laman sesawang tersebut;

- (iii) Bagi individu yang kehilangan pekerjaan, mereka boleh membuat permohonan untuk mendapatkan Skim Insurans Pekerja dan akan memperoleh *ID MyFutureJobs* secara automatik. Seorang *caseworker* akan ditugaskan untuk mengendalikan setiap pencari kerja;
- (iv) Jangkauan kepada agensi-agensi pekerjaan lain secara proaktif bagi memahami peluang-peluang pekerjaan yang aktif untuk dipanjangkan kepada pencari kerja melalui laman sesawang serta *Facebook* Pusat CAT;
- (v) Kerajaan Negeri Pulau Pinang melalui Pusat CAT terus memainkan peranannya untuk meningkatkan pertumbuhan sumber manusia melalui kempen *My Penang, My Workplace* yang bertujuan untuk membantu golongan yang hilang pekerjaan dan sumber pendapatan. Di bawah kempen ini terdapat beberapa siri webinar bertajuk *Onwards & Upwards: Explore New Careers in Penang* telah dianjurkan oleh Pusat CAT yang disertai oleh syarikat-syarikat di Pulau Pinang bagi memberi perkongsian kepada pencari kerja khususnya golongan yang hilang pekerjaan dan sumber pendapatan, lepasan graduan dan pelajar-pelajar institut pengajian tinggi mengenai peluang pekerjaan yang terdapat di syarikat masing-masing di samping keistimewaan bekerja dengan syarikat-syarikat tersebut. Sepanjang separuh tahun pertama tahun 2021, sebanyak tiga (3) siri webinar telah dianjurkan iaitu pada bulan Mac, Mei dan Ogos yang melibatkan 12 buah syarikat manakala dua (2) lagi siri akan dijalankan pada suku keempat tahun 2021;
- (vi) Bekerjasama dengan Pertubuhan Keselamatan Sosial (PERKESO) dalam membantu pencari kerja melalui program-program seperti latihan, kaunseling, insentif kewangan dan lain-lain;
- (vii) Bekerjasama dengan agensi-agensi lain untuk mempromosikan maklumat tentang peluang pekerjaan yang tersedia seperti dengan Pihak Berkuasa Pelaksanaan

Koridor Utara (NCIA) bagi program-program seperti *NCER Strategic Intervention Programme*, *empowerNCER*, *JomKerja* dan *JomNiaga* di bawah Pelan Jana Semula Ekonomi Negara (PENJANA) dan *TalentCorp* untuk program *Career Comeback*. Mempromosikan maklumat Pusat Pembangunan Kemahiran Pulau Pinang (PSDC) berkaitan *Graduate Career Acceleration Programme* (GCAP) untuk golongan belia dan siswazah yang menganggur serta program *Train and Place* jangka pendek (1 bulan) ini disasarkan untuk rakyat Malaysia yang berusia antara 21 hingga 45 tahun. Program GCAP membolehkan peserta mempelajari kemahiran yang diperlukan oleh pihak industri;

- (viii) Selain itu, Kerajaan Negeri turut bekerjasama dengan agensi-agensi lain melalui InvestPenang untuk meneruskan usaha mempromosi dan menarik pelaburan, sama ada pelabur baharu ataupun penambahan pelaburan daripada pelabur sedia ada, di samping membantu pembangunan Industri Kecil dan Sederhana (IKS) tempatan. Usaha ini akan mewujudkan lebih banyak peluang pekerjaan di Pulau Pinang dan memberi manfaat kepada pencari kerja. Berdasarkan pelaburan yang diluluskan dalam sektor pembuatan di Pulau Pinang dari Januari 2020 sehingga Jun 2021 iaitu sebanyak RM15,398,622,837.00, dianggarkan sebanyak 15,973 peluang pekerjaan akan diwujudkan di Pulau Pinang secara berperingkat bagi tahun-tahun yang akan datang;
- (ix) Selain daripada sektor pembuatan, usaha ditingkatkan dalam mempelbagaikan pelaburan daripada sektor Perkhidmatan Perniagaan Dunia (GBS) bagi menambah peluang pekerjaan dalam bidang kewangan, teknologi maklumat, seni kreatif, perisian dan sumber manusia yang bernilai tinggi; dan
- (x) Kerajaan Negeri melalui *Penang Youth Development Corporation* (PYDC) telah melancarkan portal pencarian kerja *We Want You* pada Jun 2020. Sebanyak 463 majikan telah mendaftar dalam platform ini dan mengiklankan sebanyak 990 peluang pekerjaan. PYDC juga telah melaksanakan pameran kerjaya secara maya dengan kolaborasi bersama syarikat *Plexus*, *Flex* dan *Prodelcon*.

**MESYUARAT KEDUA PENGGAL KEEMPAT
DEWAN UNDANGAN NEGERI PULAU PINANG
YANG KEEMPAT BELAS
26 NOVEMBER 2021**

PERKARA : 4(B)(XX)6

**SOALAN BERTULIS OLEH AHLI KAWASAN BERTAM
YB. KHALIQ MEHTAB BIN MOHD ISHAQ**

6. Apakah perancangan Kerajaan Negeri untuk mempelbagaikan sektor pelancongan di kawasan Seberang Perai? Bertam telah memohon untuk dinaikkan taraf Kiosk Bertam menjadi kawasan kepelbagaian makanan atau hub makanan halal serta pengindahan semula kawasan Bandar Pusat Bertam Perdana supaya lebih menarik.

**YB. YEOH SOON HIN
MENJAWAB BAGI PIHAK Y.A.B. KETUA MENTERI**

6. Kerajaan Negeri melalui Majlis Bandaraya Seberang Perai (MBSP) merancang untuk mempelbagaikan sektor pelancongan melalui pembangunan ekopelancongan.

Tambahan juga, Kerajaan Negeri juga melalui Pelan Induk Pelancongan Negeri mengenalpasti kawasan-kawasan baru untuk dijadikan produk pelancongan baru.

Bagi pengindahan Pusat Bandar Bertam Perdana, MBSP telah mengemukakan permohonan ke Kementerian Perumahan dan Kerajaan Tempatan (KPKT) bagi tahun 2021. Walau bagaimanapun, permohonan tersebut tidak berjaya dan MBSP akan terus berusaha untuk mendapatkan peruntukan bagi membangunkan kawasan Pusat Bandar Bertam Perdana.

**MESYUARAT KEDUA PENGGAL KEEMPAT
DEWAN UNDANGAN NEGERI PULAU PINANG
YANG KEEMPAT BELAS
26 NOVEMBER 2021**

PERKARA : 4(B)(XX)7

**SOALAN BERTULIS OLEH AHLI KAWASAN BERTAM
YB. KHALIQ MEHTAB BIN MOHD ISHAQ**

7. Adakah Kerajaan Negeri menyediakan satu bajet khusus untuk pelan pemulihan COVID-19?
- (a) Jika ada, jelaskan pelan tersebut dan berapakah peruntukan untuk industri pelancongan, perkhidmatan, perumahan dan sebagainya?

JAWAPAN OLEH Y.A.B. KETUA MENTERI

7. Kerajaan Negeri telah menyediakan bajet tahun 2022 dengan mengambil kira pelan pemulihan bagi sektor-sektor yang terjejas akibat pandemik COVID-19. Antara sektor yang akan diberi perhatian adalah sektor pelancongan yang terjejas akibat pandemik ini. Maklumat berkaitan pelan dan peruntukan yang dibajetkan bagi sektor-sektor berkaitan akan dibentangkan dalam sidang DUN semasa ucapan Belanjawan 2022 oleh YAB Ketua Menteri.

Selain itu, Kerajaan Negeri juga telah menubuhkan Jawatankuasa *Penang Socio Economic Recovery Consultative Council* (PSERCC) bagi membincangkan tindakan-tindakan yang boleh dilaksanakan untuk mengurangkan impak pandemik COVID-19 serta mengaktifkan kembali sektor ekonomi negeri yang terjejas. Di bawah PSERCC, enam (6) Jawatankuasa Kerja telah ditubuhkan iaitu bagi Sektor Industri/SMI/SME/Peruncitan, Sektor Pasaran Tenaga Kerja, Sektor Perumahan, Sektor Infrastruktur dan Pengangkutan, Sektor Pelancongan dan Sektor Industri Makanan. Perancangan yang telah disusun di bawah Jawatankuasa

PSERCC untuk memulihkan pertumbuhan ekonomi adalah seperti di **Lampiran A**.

**PELAN TINDAKAN DI BAWAH JAWATANKUASA
PENANG SOCIO ECONOMIC RECOVERY CONSULTATIVE COUNCIL (PSERCC)**

A) SEKTOR INDUSTRI/SMI/SME/PERUNCITAN

BIL.	PERKARA	BUTIRAN PELAKSANAAN
1	Cadangan untuk memperkenalkan semula Skim PEKA dan menyokong Perusahaan Kecil dan Sederhana (PKS) dari segi kredit.	Jawatankuasa Kerja telah mencadangkan Kerajaan Negeri untuk memperkenalkan semula Skim PEKA dan memberi bantuan kepada PKS untuk memenuhi syarat kredit. Kerajaan Negeri telah melancarkan PEKA PKS 3.0 dengan jumlah pinjaman sebanyak RM5 juta. Permohonan telah ditutup pada 29 Oktober 2021.
2	Strategi vaksinasi. Jawatankuasa Kerja telah menyuarakan kebimbangan mengenai isu berkaitan disiplin diri orang ramai, kebiasaan dengan kit ujian sendiri dan memuat naik data kepada pihak berkuasa/sistem yang berkaitan. Tambahan pula, keperluan MITI untuk ujian sendiri dua (2) kali seminggu telah menambah beban kewangan syarikat.	(i) Cadangan mewujudkan kempen kesedaran untuk mendidik orang ramai ke atas penggunaan kit ujian sendiri serta memuat naik data ke sistem. Kempen ini hendaklah dilaksanakan melalui pelbagai saluran komunikasi dan pendidikan; (ii) Cadangan untuk mengurangkan lagi kos kit ujian sendiri. Kerajaan disarankan untuk membeli kit ujian COVID-19 secara pukal melalui PERKESO; dan (iii) Cadangan Kerajaan Persekutuan untuk mempertimbangkan pengecualian cukai bagi pembelian kit ujian COVID-19.
3	Mengemaskini Akta Standard Minimum Perumahan, Penginapan Dan Kemudahan Pekerja 1990 [Akta 446].	Lembaga Pembangunan Industri Pembinaan (CIDB) telah menyediakan garis panduan kepada syarikat pembinaan untuk membina kuarters buruh berpusat (CLQ) di dalam tapak pembinaan sebagai salah satu keperluan untuk menyambung semula kerja pembinaan. Kementerian Perumahan dan Kerajaan Tempatan pula telah menyediakan garis panduan untuk membenarkan penukaran lot kedai dan gudang kepada asrama pekerja buat sementara waktu bagi tempoh 2021-2023. Dicadangkan supaya Pihak Berkuasa Tempatan (PBT) memberi pertimbangan kepada permohonan syarikat untuk menukar lot kedai dan gudang kepada asrama pekerja secara sementara selari dengan garis panduan

BIL.	PERKARA	BUTIRAN PELAKSANAAN
		dan polisi penguatkuasaan Kerajaan Persekutuan.
4	Penyediaan SOP khusus mengikut sektor.	Pada masa ini, semua sektor mengamalkan SOP yang sama. Dicadangkan supaya Kerajaan Persekutuan mengkaji semula SOP khusus untuk sektor-sektor yang berkenaan. COVID-19 <i>Employee Health & Safety Industry Advisory Group</i> (C19-EHS-IAG) telah ditubuhkan dan dipengerusikan oleh YB. Dato' Halim dengan keahlian MITI, CITF Negeri, DOSH, JKN PP, PDC, iP, FMM Pulau Pinang, Crest dan wakil industri. Beberapa amalan terbaik berkaitan COVID-19 telah dilancarkan oleh YAB Ketua Menteri dan dikongsi dengan wakil industri melalui Crest. Satu webinar telah diadakan pada 14 Oktober 2021 dengan kehadiran 350 peserta di mana wakil utama industri berkongsi amalan dan pengalaman mereka.

B) SEKTOR PASARAN TENAGA KERJA

BIL.	PERKARA	BUTIRAN PELAKSANAAN
1	Platform berkenaan maklumat dan statistik sektor pasaran tenaga kerja di Pulau Pinang	Satu sekretariat untuk mengumpulkan maklumat dan statistik sektor pasaran tenaga kerja telah ditubuhkan yang merangkumi Penang CAT Centre, Penang Skills Development Centre, Penang Institute, PERKESO, FREPENCA dan BPEN. Sekretariat ini akan menyediakan maklumat dan statistik berkaitan situasi pasaran tenaga kerja di Pulau Pinang kepada YB EXCO Pembangunan Modal Insan. Laporan mingguan di hantar ke pejabat YB EXCO.
2	Memperkasakan peranan Penang CAT Centre	Penang CAT Centre terus memainkan peranannya untuk meningkatkan pembangunan sumber manusia melalui kempen <i>My Penang, My Workplace</i> yang bertujuan untuk menarik bakat-bakat dari seluruh negara bagi memilih Pulau Pinang sebagai destinasi kerjaya. Di bawah kempen ini, terdapat tiga (3) siri webinar yang dihadiri oleh 1,832 orang pencari kerja, lepasan graduan dan pelajar-pelajar institut pengajian tinggi dari seluruh negara. Webinar yang bertajuk "<i>Onwards & Upwards</i>:"

BIL.	PERKARA	BUTIRAN PELAKSANAAN
		<i>Explore New Careers in Penang</i> ” telah dianjurkan oleh Penang CAT Centre dan disertai oleh syarikat-syarikat dari Pulau Pinang seperti Micron, Clarivate, Keysight, ViTrox, Jabil, Pentamaster, Teleperformance, ManpowerGroup, LAM Research, DELL Technologies, Analog Devices dan Greatech.
3	Syarikat memainkan peranan dengan mendaftarkan pekerja yang bakal kehilangan kerja di sistem Penang CAT Centre/MyFutureJobs	Individu kehilangan pekerjaan yang membuat permohonan untuk mendapatkan Skim Insurans Pekerja akan memperolehi ID MyFutureJobs secara automatik dan seorang <i>caseworker</i> akan ditugaskan untuk membantu setiap pencari kerja. Penang CAT Centre secara berterusan menjalankan aktiviti pepadanan kerja bagi mereka yang kehilangan pekerjaan dengan syarikat syarikat baru yang melabur di Pulau Pinang.
4	Program peningkatan kemahiran pekerja	Di bawah Penjana Kerjaya, majikan yang mengambil pekerja layak memohon subsidi agar pekerja tersebut menjalani latihan semula atau peningkatan kemahiran (<i>re-skilling & upskilling</i>) berdasarkan keperluan pekerjaan atau industri berkenaan, tertakluk kepada kadar antara RM4,000 hingga RM7,000. PSDC juga menawarkan pelbagai kursus jangka pendek dan seminar dalam bidang teknikal, <i>soft skills</i> dan IT yang boleh disertai oleh pekerja bagi meningkatkan kemahiran mereka. Antara kursus yang ditawarkan oleh PSDC adalah seperti Program Star, Gcap dan Talent Corp.
5	Kajian untuk mengenal pasti pengangguran yang bakal berlaku dan puncanya serta meneliti dan menangani persaingan antara pekerja yang kehilangan kerja dan pencari kerja lepasan universiti	Penang Institute telah memulakan kajian tersebut dan dalam proses pengumpulan data. Kajian dijangka akan disiapkan pada akhir tahun 2021. Kos pelaksanaan kajian termasuk dalam permohonan peruntukan Penang Institute kepada Kerajaan Negeri bagi tahun 2021.
6	Satu forum diadakan bersama <i>stakeholders</i> dan pemain industri dalam membincangkan dan meneliti isu pekerjaan dan pemantapan modal insan.	Penang Institute akan mengadakan perbincangan bersama <i>Malaysia Semiconductor Industry Association</i> (MSIA) bagi pengantaraan forum ini.

C) SEKTOR PERUMAHAN

BIL.	PERKARA	BUTIRAN PELAKSANAAN
1	Insentif kepada pembeli	(i) Had siling maksima RMM diturunkan sebanyak 10 peratus bagi projek baru; (ii) keluasan RMM ditingkatkan 50kps jika pemaju ingin mengekalkan harga maksima asal; dan (iii) skor minima 70% Qclassic CIDB.
2	Insentif kepada pemaju	(i) Pengurangan harga had siling hartanah pembelian warga asing bagi tempoh 1 tahun; (ii) pengurangan Fi Kelulusan (<i>State Consent Fees</i>) sebanyak 50% secara menyeluruh bagi tempoh 1 tahun; (iii) pengecualian levi pembelian warga asing bagi tempoh 1 tahun; (iv) penggunaan kuota RMM mengikut PBT; (v) nisbah Plot 1:4 pembinaan RMM & RMM B; dan (vi) pengurangan kos pembangunan bagi tempoh 1 tahun.
3	Insentif tambahan kepada pemaju. Cadangan dan syor pengurangan kos pembangunan dan pematuhan.	(i) Pengurangan kadar sumbangan <i>in kind</i> pembukaan pasaran terbuka RMM 100 peratus kepada LPNPP; (ii) pengecualian Pemeriksa Bebas bagi Laporan Kajian Lalulintas (TIA) dan Penyediaan Laporan Kajian Impak Sosial (SIA); dan (iii) diskaun 50% dari 15% premium nilai tanah dikenakan.

D) SEKTOR INFRASTRUKTUR DAN PENGANGKUTAN

BIL.	PERKARA	BUTIRAN PELAKSANAAN
1	Pelaksanaan <i>Penang South Reclamation</i> (PSR) - <i>Island A</i>	PSR akan dibangunkan sebagai satu kawasan perindustrian baharu di selatan Pulau Pinang untuk industri berteknologi tinggi yang akan menarik pelabur asing ke negeri kita pada masa hadapan. Pembangunan zon perindustrian baru dan bandar raya pintar akan membolehkan Pulau Pinang menarik pelaburan langsung asing serta mewujudkan peluang pekerjaan yang berkualiti dan memanfaatkan bakat-bakat tempatan. Kerajaan Negeri dalam tindakan pengemukakan semula laporan EIA kepada Jabatan Alam Sekitar (JAS) dijangka pada suku pertama tahun 2022.
2	Pelaksanaan Lebuhraya <i>Pan Island Link 1</i> , Fasa 1A (PIL 1 - Fasa 1A)	Pembangunan strategik Lebuhraya PIL 1 bertujuan melancarkan aliran trafik dengan menghubungkan enam persimpangan ke Gurney Expressway serta membolehkan pengguna jalan raya mengelakkan kawasan berkepadatan tinggi seperti George Town, Paya Terubong, Bayan Baru, dan Relau. Pelaksanaan projek PIL Fasa 1A ditangguhkan dan perancangan pelaksanaan akan dinilai semula pada tahun 2022.
3	Projek Lebuhraya PIL2A (Fasa 1) - <i>Link</i> utama yang menghubungkan <i>existing island</i> dengan Pulau A	Projek Lebuhraya PIL2/2A bertujuan meningkatkan akses dan membuka peluang pembangunan masa hadapan di Teluk Kumbar dan Balik Pulau, serta mengalihkan tumpuan pembangunan daripada George Town. Pelaksanaan tertakluk kepada kelulusan EIA PSR (<i>resubmission</i>).
4	<i>Penang Connectivity Master Plan</i> (PCMP) (a) Projek Penaiktarafan Infrastruktur <i>Copper</i> Milik Telekom Malaysia (TM) kepada Fiber Optik di seluruh Negeri Pulau Pinang.	70% kawasan di seluruh Negeri Pulau Pinang telah dinaiktaraf kepada jaringan fiber optik Unifi sehingga bulan Oktober 2021. Dijangka akan mencapai 100% <i>fiberisation</i> menjelang Jun 2022.
	(b) Projek <i>Allo Nationwide Fiberisation Plan</i> (AFNP)	Bagi kawasan Seberang Perai, setakat bulan Oktober 2021, sebanyak 3,000 pemasangan

BIL.	PERKARA	BUTIRAN PELAKSANAAN
	(c) Projek <i>Fiber Clip On Solution</i> (FTTL) (d) Projek <i>Smart Street Pole</i> di Negeri Pulau Pinang	yang melibatkan <i>home premises</i> telah berjaya dilaksanakan. Baki sebanyak 8,000 pemasangan sedang berlangsung dan akan disiapkan sepenuhnya pada hujung tahun ini. Pada tahun 2022, pemasangan <i>home premises</i> akan dibuat di bahagian Pulau. Dijangka sebanyak 39,000 pemasangan akan dijalankan di kawasan Gelugor, Jelutong dan Balik Pulau. Setakat Oktober 2021, sebanyak 10,616 pemasangan telah siap melibatkan <i>home premises</i> di seluruh negeri Pulau Pinang. Terdapat sebanyak 1,179 permohonan masih belum dilaksanakan disebabkan belum mendapat kelulusan PBT. Pelaksanaan projek masih di peringkat <i>Proof of Concept</i> (POC) oleh Syarikat Webe Digital Sdn Bhd dan Celcom Berhad. Pihak Webe telah menyiapkan kerja-kerja pembinaan tapak <i>Smart Street Pole</i>. Struktur tiang dijangka akan siap dipasang pada minggu terakhir bulan Oktober 2021. Pihak Celcom telah mengemukakan cadangan lokasi baharu iaitu di Kampung Baru, Sg Ara. Pejabat Daerah dan Tanah sedang menyemak status tanah yang telah dicadangkan oleh pihak Celcom. Lot yang terlibat adalah 11542,7483 dan di Jalan Pintas Sungai Ara 6.
5	Cadangan Pembinaan Pencawang Masuk Utama (PMU) 275 kV	Proses perbincangan mengenai pajakan tanah bagi tapak pencawang telah diadakan pada 8 Oktober 2021 di antara JKPTG, KETSA, ST dan TNB. Pihak JKPTG telah meletakkan harga pajakan tanah sebanyak RM651,000.00 setahun untuk tempoh pajakan selama 30 tahun. Jumlah ini tidak dipersetujui oleh pihak KETSA/ ST dan memohon untuk harga pajakan dikenakan sebanyak RM1,000.00 setahun. Kelulusan bagi menanggung kos pemindahan dari pihak KETSA telah diperolehi bagi TNB meneruskan proses selanjutnya.
6	<i>Sungai Perak Raw Water Transfer Scheme</i> (SPRWTS)	Perunding Iantikan KeTSA telah membentangkan 4 opsyen berkaitan punca saliran air (water supply). 3 opsyen ditolak

BIL.	PERKARA	BUTIRAN PELAKSANAAN
		atas <i>technical viability</i> (punca air dari <i>upstream</i>) menjejaskan operasi Empangan Chenderoh. Opsyen 4 sumber air dari <i>down stream</i> disyorkan oleh perunding lantikan KeTSA. Laporan akhir perunding dijangka siap pada November 2021.

E) SEKTOR PELANCONGAN

BIL.	PERKARA	BUTIRAN PELAKSANAAN
1	Program promosi dan rangsangan pasaran tempatan	(i) Penjenamaan dan memperkenalkan semula <i>Experience Penang Year</i> yang menjadi tema kempen pelancongan Pulau Pinang; (ii) Kempen taktikal merangkumi produksi video (<i>The opposite side of the Island, Penang through the lens, 20+1 Reasons to Visit Penang</i> dan lain-lain), kempen <i>Penang Tour Packages</i> dan reka bentuk brosur baharu; (iii) Kempen pengiklanan di <i>family mart retails, covered walkaways, giant cubes</i>, laman web <i>Penang Travel Deals</i> dan sebagainya; (iv) Promosi <i>muslim-friendly</i> dan halal melalui risalah serta <i>Muslim Travel Guide Booklets</i>; dan (v) Mempromosikan <i>Penang Hill Biosphere Reserve</i>.
2	Kempen <i>Responsible Tourism</i>	Mewujudkan kesedaran masyarakat akan tanggungjawab operator tempat tarikan pelancongan dan tanggungjawab pelancong.
3	Penyediaan skim faedah sifar bagi meningkatkan aliran tunai perniagaan supaya dapat bertahan sepanjang tempoh kemelesetan ekonomi	Skim PEKA 2.2 telah diperkenalkan sebagai lanjutan kepada Skim PEKA 2.0 & 2.1 yang terdahulu. Skim ini menawarkan pinjaman berjumlah RM5,000 hingga RM50,000 kepada pemain-pemain sektor pelancongan yang belum menerima pinjaman PEKA. Komponen <i>Creative Leap Loan</i> juga ditawarkan kepada pengusaha daripada industri kreatif. Subsidi TNB antara RM500 hingga RM5,000 juga telah diberikan kepada

BIL.	PERKARA	BUTIRAN PELAKSANAAN
		semua pemain-pemain industri pelancongan berlesen.
4	Mempromosikan Pulau Pinang secara digital untuk mencapai sasaran pelancong lebih tinggi dan impak media sosial yang diinginkan	Promosi melalui kolaborasi dengan <i>Ink Global - Going Places official website</i> dan Shopee. Dipilih kerana mempunyai ramai pengguna tempatan di Facebook / laman web. Ia berupaya untuk memacu pelancongan domestik dan menarik minat kepada Pulau Pinang. Tumpuan diberikan kepada pengalaman peribadi pengguna untuk mempromosikan tempat tarikan domestik. " <i>Penang Stories</i> " juga diterjemahkan dan dimuat naik ke laman web pelancongan <i>mypenang.gov.my</i> dan dipromosikan melalui media sosial.
5	<i>Tradeshows / Fairs</i>	Penyertaan dalam <i>Tradeshows / Fairs</i> untuk mengekalkan penjenamaan Pulau Pinang di pasaran luar negara. Penglibatan dalam pameran perdagangan antaranya adalah <i>ITB Asia Virtual, Virtual Wedding Festival, Malaysia Meet 2021 - Istanbul, Moscow and Almaty, Travel Meet Asia Virtual, ITB China, New Zealand Travel with Malaysia Airlines, Online Cooking Class with Malaysia Airlines and Travel Agents, Virtual Tour - The Habitat with Scandinavia Travel Agents</i> dan <i>Nordic Travel Agents with Tourism Malaysia</i> .
6	Penjenamaan semula imej penarik beca	Menganjurkan dialog untuk memberi penekanan kepada kepentingan norma baharu. Menyediakan pakaian seragam baharu kepada semua penarik beca dan menaiktaraf beca.
7	Penganjuran acara/program MICE secara hibrid	Mengguna pakai model hibrid untuk acara/program MICE iaitu penganjuran secara fizikal dan maya untuk membolehkan penyertaan peserta domestik dan antarabangsa. Oleh itu, acara/program MICE masih boleh diteruskan tidak mengira situasi COVID-19. Antara program terlibat adalah <i>4rd Annual Penang International Travel Exchange (PITE 2021)</i> , Program <i>IEEE IEACon 2021 – Virtual Conference on Electrical and Electronics</i> , Program <i>BE@ Penang 2021</i> dan <i>Spotlight 2021 by Penang Arts District</i> .

F) SEKTOR INDUSTRI MAKANAN

BIL.	PERKARA	BUTIRAN PELAKSANAAN
1	Penguatkuasaan Rumah Sembelih (Akta rumah sembelihan di bawah Jabatan Perkhidmatan Veterinar (JPV) Pulau Pinang adalah meliputi rumah sembelihan babi dan ruminan sahaja)	(i) Sehingga kini, 5 buah rumah sembelihan babi telah dilesenkan dan 2 buah rumah sembelihan ruminan swasta dilesenkan serta 1 rumah sembelihan ruminan JPV; (ii) 5 buah rumah sembelihan babi tersebut terbahagi kepada 1 di SPS, 2 di SPU, 1 di DBD dan 1 di DTL manakala rumah sembelihan ruminan di DTL dan SPT; dan (iii) JPV telah menghantar notis kepada pemilik Rumah Sembelihan yang tidak berlesen untuk tidak beroperasi dan tindakan penguatkuasaan akan diambil ke atas aduan yang diterima oleh Jabatan.
2	Wabak penyakit <i>Lumpy Skin Disease</i> (LSD) pada ternakan lembu	(i) Kertas MMK telah dibentangkan dan diluluskan pada 23 Julai 2021 dan pewartaan dalam peringkat proses dokumentasi; (ii) Permohonan peruntukan perolehan vaksin dengan anggaran RM72,000 setahun dipohon untuk tahun 2022. Bagi tahun 2021, perolehan vaksin menggunakan penjimatan daripada peruntukan tahun Jabatan semasa; dan (iii) Peruntukan wang ehsan/saguhati bagi ternakan yang diarahkan dilupus akibat penyakit dengan anggaran RM30,000 setahun. Sebanyak 18 ekor lembu dari 5 penternak telah dilupuskan dengan jumlah wang ehsan dianggarkan sebanyak RM13,860.00.
3	Isu kenaikan harga makan ternakan susulan daripada kenaikan bekalan bahan mentah yang diimport	(i) Perundingan dengan MPOB mengurangkan kapasiti eksport PKE yang merupakan sumber bahan mentah dalam negara. Bajet Belanjawan Malaysia 2022 (MAFI) – Program Bantuan Insentif Makanan Ternakan Ruminan Melalui Skim Harga Bersubsidi Dedak Isi Rong

BIL.	PERKARA	BUTIRAN PELAKSANAAN
		Sawit: Bekalan makanan ternakan dengan harga lebih murah selaras konsep ekonomi kitaran. Memberi manfaat kepada penternak kecil ruminan; (ii) Insentif bekalan makanan dan bahan makanan tambahan kepada penternak terkesan. Pemberian Bantuan Makanan Ternakan & Penokok Diet (Supplement) Ternakan telah dilaksanakan melalui Pakej Bantuan Rakyat Pulau Pinang 2.0 berjumlah RM 200,001.50 dengan 988 orang penerima pada tahun 2020 dan melalui Pakej Bantuan Rakyat Pulau Pinang 3.1 melibatkan peruntukan sebanyak RM574,424.00 dengan 1,088 penerima pada tahun 2021. Pemberian insentif makanan ternakan juga diperluaskan kepada penternak aneka haiwan (kuda, arnab dan rusa) di Negeri Pulau Pinang Tahun 2021 dengan penerima sebanyak 43 orang berjumlah RM28,304.00; (iii) cadangan kajian berterusan sumber bahan mentah alternatif yang tersedia dalam negara sebagai bahan mentah; (iv) mempertimbangkan lebih banyak bantuan sokongan tanaman fodder untuk penternakan ruminan dan makanan alternatif bagi ternakan lain sebagai bekalan makanan utama untuk mengurangkan kebergantungan kepada makanan komersial/pallet melalui permohonan bantuan Jabatan; dan (v) usul penternak dan pengeluar makanan ialah untuk Kerajaan menyediakan geran pembangunan atau pinjaman kadar faedah rendah bagi membantu pengeluar makanan dan penternak mengurangkan harga makanan dan mengurangkan harga kos makanan. Pihak agrobank diminta untuk menyediakan maklumat lanjut tentang inisiatif ini.

BIL.	PERKARA	BUTIRAN PELAKSANAAN
		JPV telah menyediakan kertas cadangan berkaitan bagi industri unggas iaitu pinjaman mudah, insentif pengeluaran, pengurangan tarif kadar elektrik dan elaun pelaburan semula. JPV telah menyediakan kertas cadangan berkaitan bagi industri ruminan iaitu MPIC - Kertas Dasar PKC Untuk Makanan Negara dengan mengekalkan 10% pengeluaran untuk kegunaan dalam Negara, Kertas Cadangan Bantuan Insentif Harga Makanan Ternakan Ruminan Melalui Skim Harga Bersubsidi Dedak Isirong Sawit – telah dibentangkan dalam Bajet Belanjawan Malaysia 2022, Kerjasama Strategik FGV dan LPP dengan mensasarkan penternak ruminan mendapat sumber makanan ternakan berkualiti pada harga kompetitif, Penubuhan Jawatankuasa Pasukan Petugas Khas Berkenaan Isu Import Makanan Ternakan serta Cadangan Sumber Alternatif Kepada Makanan Ternakan Sedia Ada.
4	Kenaikan harga produk ternakan seperti ayam	Usul pengusaha mencadangkan pihak kerajaan menyediakan tempat atau gudang penyimpanan sejukbeku bagi dijadikan produk-produk ternakan sebagai produk sejukbeku serta stok penimbun bagi kawalan harga produk tersebut. Bajet Belanjawan Malaysia 2022 (MAFI) – Program Pemantapan Jaminan Bekalan Makanan Negara: Menyediakan kemudahan logistik dan pusat penyimpanan stok bekalan makanan dan hasil pertanian segar berteknologi tinggi. Memberi manfaat kepada petani dan pengusaha agromakanan.
5	Pelaksanaan Sistem Penternakan Moden mampu meningkatkan pengeluaran melalui peningkatan populasi ternakan dalam kapasiti ladang yang sama dengan lebih berkualiti dan mesra alam	Pelaksanaan merangkumi dua pendekatan seperti berikut: (i) Pelaksanaan Enakmen Penternakan Babi yang bermula tahun 2020 dengan penguatkuasaan pelesenan ladang ternakan di atas kepatuhan syarat-syarat pelesenan yang telah ditetapkan. Sebanyak 143 ladang ternakan babi telah dilesenkan

BIL.	PERKARA	BUTIRAN PELAKSANAAN
		mengikut kriteria dan syarat yang telah ditetapkan dalam pelesenan. Ketika ini, verifikasi ladang babi sedang dilaksanakan bermula 2 Ogos 2021 dan seterusnya semua ladang babi perlu mengamalkan penternakan secara kandang tertutup sepenuhnya mulai tahun 2022; dan (ii) Enakmen Perlindungan Unggas Negeri Pulau Pinang 2020 telah diwartakan pada 19 Oktober 2020 dan berkuatkuasa pada 1 Januari 2021 bagi memastikan ladang-ladang ternakan beroperasi mengikut keperluan dan mematuhi kehendak asas regulatori veterinar. Peraturan-Peraturan Pengawalan Perlindungan Unggas dalam proses semakan undang-undang sebelum ianya diimplementasi dan dilaksanakan oleh pihak Jabatan.
6	Keselamatan Makanan (<i>Food Safety</i>)	(i) Penguatkuasaan Akta Rumah Sembelih (Penswastan 1993) – Pemeriksaan <i>Ante / Post Mortem</i> bagi memastikan prosedur pemeriksaan daging dipatuhi untuk menjamin keselamatan kepada pengguna; dan (ii) Penempatan Pegawai Pemeriksa Daging (<i>Meat Inspector</i>) – Kemasukan sebanyak 12 orang pegawai (<i>contract of service</i>) pada Mac 2021 untuk pemeriksaan daging di rumah sembelih swasta yang terlibat memastikan bekalan daging suci, sihat serta selamat untuk dimakan. Tindakan telah diambil bagi menyelesaikan masalah yang timbul.
7	Penstrukturan Semula Kawasan Kekal Ternakan	Mewujudkan kawasan penternakan dirancang sebelum ini sebagai kawasan pembangunan industri penternakan di kawasan khas penternakan (dicadangkan seumpama ini dalam Deraf Rancangan Tempatan Seberang Perai 2030) sebagai kawasan pengeluaran ternakan berpusat

BIL.	PERKARA	BUTIRAN PELAKSANAAN
		dan kekal bagi jaminan pengeluaran hasil makanan dan keselamatan makanan (<i>food security</i>). Cadangan menggunakan tanah-tanah di bawah rentis TNB serta tanah-tanah yang digunakan khas untuk fasiliti awam. Perlu mendapat kebenaran daripada pihak atau pemilik tanah tersebut.
8	Projek 'Farmer to Farmer'	(i) Terdapat 11 projek sebagai projek "pilot" merangkumi 10 projek fertigasi dan 1 projek Cendawan; (ii) Telah mendapat persetujuan penggunaan peruntukan Pembangunan di bawah P01. Program dijangka akan dilaksanakan sebelum akhir bulan Ogos 2021; (iii) Manakala projek Industri Asas Tani lebih kepada pembangunan berpusat iaitu menyediakan kemudahan pembungkusan berpusat (Penggunaan Mesin <i>Retort</i>); dan (iv) Pihak Syarikat MyOrganic Farm telah memaklumkan kepada jabatan tidak dapat menyediakan kerja-kerja pelaksanaan projek dan pihak jabatan akan mengambil tindakan pelaksanaan projek ini. Namun Syarikat ini akan terlibat dalam tunjuk ajar kepada petani bersama-sama Jabatan Pertanian.
9	Projek Pembangunan Pusat Agro Pelancongan Relau	Mentransformasikan <i>Relau Smart Farming and Agrotourism Centre</i> sebagai hub inovasi pertanian yang menggalakkan usahawan agro serta perkembangan usahawan kecil sederhana dan memandu inovasi teknologi. Kerajaan Negeri melalui Jabatan Pertanian dalam perancangan jangka masa panjang untuk membangunkan semula Pusat Agro Pelancongan Relau. Buat masa ini, Jabatan Pertanian akan menyediakan Laporan Audit Fizikal Pusat Agropelancongan Relau selain meneliti cadangan menyediakan RFP untuk pembangunan pusat ini.

BIL.	PERKARA	BUTIRAN PELAKSANAAN
10	Kenaikan Harga Bahan Tanaman Padi	Sektor Persatuan Tanam Padi memaklumkan terdapat rungutan dari petani mengenai peningkatan kos seperti racun dan baja yang meningkat di antara 90% hingga 100%. Kenaikan harga ini disebabkan oleh kesan pandemik COVID-19 yang melanda dunia. Jabatan Pertanian Negeri Pulau Pinang telah mengadakan sesi <i>hands on</i> kepada petani bagi penyediaan baja sendiri. Jabatan Pertanian Negeri Pulau Pinang juga akan memohon KPDNHEP untuk membuat pemantauan harga serta mengawal kenaikan harga tersebut.
11	Projek 'Farm to Farm' - Projek ternakan keli	BQ untuk projek berkenaan telah disiapkan oleh Jabatan Perikanan dan telah diserahkan kepada BPEN. Satu mesyuarat telah diadakan yang dipengerusikan oleh YB Exco pada 20 Ogos 2021 (Jumaat) bagi membincangkan perkara tersebut. Jabatan Kewangan Negeri memaklumkan bahawa sebutharga untuk projek tersebut perlu dilaksanakan oleh BPEN. Pihak BPEN dalam proses perolehan sebutharga tersebut.
12	Projek TOL Kerang	Kajian telah dilaksanakan di daerah SPU dan di Beting Selatan. Sekarang ini dalam proses untuk menghabiskan kajian biomass di daerah SPT dan SPS. Sebanyak 13 Lot Penternakan Kerang di SPU akan dibuka. Iklan penyertaan peserta kebun kerang, Seberang Perai Utara, Pulau Pinang telah dikeluarkan pada 18 Ogos 2021. Sesi temuduga bersama Jabatan Perikanan dan Pejabat Tanah dan Daerah SPU pada 27/10/2021 - 140 orang ditemuduga, 90% adalah nelayan. Manakala di SPS pengusaha bersetuju berpindah ketempat lain dengan asas pihak FRI telah membuat siasatan dan kaian dikawasan tersebut. Data Sistem Kultur Laut (SKL) 2020: Kerang – pengeluaran 2,691.32 mt dengan nilai RM21,531,887.61
13	Lesen Sampan Khas Negeri Pulau Pinang	Permohonan oleh nelayan dari tahun 2018 hingga 2020.

BIL.	PERKARA	BUTIRAN PELAKSANAAN
		Kelulusan – 535 Lesen yang telah keluar - 326 KIV untuk siasatan semula – 38 Tidak disokong – 72 Tidak Hadir (Tidak hadir sewaktu program sukat sampan bagi tujuan pelesenan) – 51 Baki (Nama <i>duplicate</i>) – 48 Data Perikanan Tangkapan 2020 : Pendaratan untuk perikanan tangkapan yang meliputi kesemua zon (A, B, C, C2/C3) ialah sebanyak 56,848.53 MT dengan nilai RM513,426,731.71
14	Projek HUB Tuna di Jeti Batu Maung	Pihak Penang Development Corporation (PDC) tidak meluluskan permohonan dari Syarikat Abadi Utama Food Industries Sdn. Bhd. sewaktu Mesyuarat MMK Negeri Pulau Pinang pada 11 Ogos 2021. Hal ini kerana bekas Restoran Jeti Batu Musang tersebut akan dirobohkan untuk tujuan pembangunan lain (Ecotourism dan Pembangunan Bercampur). Satu Mesyuarat di antara pihak PDC bersama PPN Pulau Pinang telah diadakan pada 18 Ogos 2021 bagi membincangkan perkara ini dengan lebih lanjut. Satu penyelesaian terbaik akan dicapai setelah pembentangan lanjut oleh pemohon kelak. (i) 93,898 tan metrik hasil perikanan yang dianggarkan bernilai RM1.16 bilion setahun (ii) Vesel tuna di Pulau Pinang ada 11 buah. Pendaratan di Dermaga Dalam, Penang Port (iii) Untuk tahun 2020, sebanyak 30 kali pendaratan telah dicatatkan iaitu melibatkan 11 vesel tempatan dan 2 vesel asing (iv) Sebanyak 1,943,843.53 kg ikan tuna telah didaratkan di Penang Port yang membawa nilai USD 7,775,374.12 atau RM 31,196,496.48.

BIL.	PERKARA	BUTIRAN PELAKSANAAN
15	Industri Asas Tani (IAT) - <i>Retort Technology</i>	Kerajaan Negeri telah memperuntukkan 1 juta untuk menggalakkan usahawan menjual di Shopee. Bagi mempromosikan penggunaan teknologi <i>retort</i> dalam industri makanan, pengusaha IAT di Pulau Pinang digalakkan untuk menggunakan teknologi tersebut. Oleh itu, pada tahun 2021 sebanyak 2 projek yang menggunakan teknologi <i>retort</i> akan dilaksanakan. Projek tersebut akan diperluaskan lagi pada masa hadapan. Dalam proses perolehan peralatan <i>retort</i> untuk kegunaan usahawan kecil makanan.
16	Kekurangan tenaga kerja di sektor pertanian	Program rekalibrasi tenaga kerja telah dilaksanakan oleh pihak Jabatan Imigresen untuk mengisi keperluan tenaga kerja disemua sektor termasuk sektor pertanian.
17	Program peningkatan mutu pengurusan penanaman padi (Program Smart Sawah Bersekala Besar (SBB))	Pihak Jabatan Pertanian akan memanggil pihak AIDA untuk memberi taklimat kepada Pengerusi Jawatankuasa Agroteknologi dan Keselamatan Makanan, Pembangunan Luar Bandar dan Kesihatan Negeri Pulau Pinang mengenai program ini.

**MESYUARAT KEDUA PENGGAL KEEMPAT
DEWAN UNDANGAN NEGERI PULAU PINANG
YANG KEEMPAT BELAS
26 NOVEMBER 2021**

PERKARA : 4(B)(XX)8

**SOALAN BERTULIS OLEH AHLI KAWASAN BERTAM
YB. KHALIQ MEHTAB BIN MOHD ISHAQ**

8. Adakah Bas CAT di kawasan Bertam akan diteruskan?
- (a) Jika ada, bilakah ianya akan disambung semula? Laluan CAT Bertam perlukan perubahan untuk memastikan rakyat di kawasan kampung seperti Kampung Permatang Sintok, Permatang Rambai, Permatang Kuala, Permatang Pauh, Permatang Berah serta Pdang Benggali mendapat manfaat.

**YB. ZAIRIL KHIR JOHARI MENJAWAB BAGI PIHAK
Y.A.B. KETUA MENTERI**

8. Kesemua perkhidmatan Bas Percuma *Congestion Alleviation Transport* (CAT) termasuk bas CAT Bertam telah diberhentikan operasinya pada 4 April 2020 berikutan penularan wabak Covid-19. Laluan bas CAT Bertam ini tidak akan dioperasikan semula di bawah pembiayaan Bas Percuma CAT memandangkan laluan ini mempunyai bilangan penumpang (*ridership*) yang sangat rendah.

Susulan daripada itu bagi memastikan rakyat terus mendapat manfaat dengan menikmati perjalanan menggunakan pengangkutan awam secara percuma, Kerajaan Negeri telah melancarkan kolaborasi pembiayaan Pas Perjalanan Tanpa Had My30 pada 1 Mac 2021 yang lalu. Melalui pembiayaan ini, kesemua laluan bas berbayar milik Rapid Penang adalah percuma dengan syarat penumpang melanggan dan menggunakan pas My30 untuk menaiki bas. Inisiatif ini telah memberi manfaat kepada seluruh penduduk Pulau Pinang

berbanding pengoperasian Bas Percuma CAT yang hanya tertumpu kepada laluan-laluan tertentu sahaja.

**MESYUARAT KEDUA PENGGAL KEEMPAT
DEWAN UNDANGAN NEGERI PULAU PINANG
YANG KEEMPAT BELAS
26 NOVEMBER 2021**

PERKARA : 4(B)(XX)9

**SOALAN BERTULIS OLEH AHLI KAWASAN BERTAM
YB. KHALIQ MEHTAB BIN MOHD ISHAQ**

9. Apakah perancangan Kerajaan Negeri untuk memastikan Taman Herba di Bertam Kepala Batas menjadi kawasan tumpuan pelancongan?

**YB. YEOH SOON HIN
MENJAWAB BAGI PIHAK Y.A.B. KETUA MENTERI**

9. Kerajaan Negeri melalui Jabatan Pertanian Negeri telah menjalinkan kerjasama dengan Tourism Malaysia dalam usaha menjadikan Taman Herba Bertam sebagai salah satu tempat tarikan pelancongan baharu yang wajib dikunjungi. Pihak yang terlibat juga giat mempromosikan Taman Herba Bertam melalui penglibatan penyiaran televisyen seperti penggambaran drama dan majalah televisyen, misalnya penggambaran majalah televisyen "*WANDER WONDER*" terbitan TV Alhijrah yang dirancang akan dilakukan pada 20 Disember 2021 di samping giat menjalankan promosi melalui media massa terutamanya laman web Jabatan Pertanian Negeri, *facebook*, *telegram* dan *twitter*.

Majlis Bandaraya Seberang Perai (MBSP) juga merancang untuk mempromosikan Taman Herba Bertam melalui penyediaan dokumentari berkenaan taman tersebut dan menyenaraikannya sebagai salah satu kawasan pelancongan yang menarik di Negeri Pulau Pinang.

**MESYUARAT KEDUA PENGGAL KEEMPAT
DEWAN UNDANGAN NEGERI PULAU PINANG
YANG KEEMPAT BELAS
26 NOVEMBER 2021**

PERKARA : 4(B)(XX)10

**SOALAN BERTULIS OLEH AHLI KAWASAN BERTAM
YB. KHALIQ MEHTAB BIN MOHD ISHAQ**

10. Mohon Kerajaan Negeri senaraikan "land bank" milik Kerajaan Negeri mengikut lokasi, keluasan dan kategori.
- (a) Berapa banyakkah tanah Kerajaan Negeri yang telah dijual kepada pihak swasta dan anak anak syarikat Kerajaan Negeri mengikut lokasi, keluasan, kategori kegunaan, projek dan pemaju?

JAWAPAN OLEH Y.A.B. KETUA MENTERI

10. (a) Tanah Kerajaan ertinya semua tanah di dalam negeri itu termasuk sebanyak mana dasar mana-mana sungai dan tepi pantai serta dasar laut seperti yang adalah dalam lingkungan wilayah negeri itu atau batas perairan wilayah selain dari:
- (i) tanah berimilik;
- (ii) tanah rizab;
- (iii) tanah lombong;
- (iv) mana-mana tanah yang, di bawah peruntukan-peruntukan mana-mana undang-undang yang berhubungan dengan hutan (sama ada diluluskan sebelum atau selepas permulaan Akta ini), buat masa itu adalah hutan simpanan.

Oleh yang demikian, keluasan tanah kerajaan tidak dapat disediakan kerana merangkumi skop yang luas.